

Trefniadau ar gyfer Comisiynu Gwasanaethau – Cyngor Bwrdeistref Sirol Wreccsam

Blwyddyn archwilio: 2023-24

Dyddiad cyhoeddi: Mawrth 2025

Cyfeirnod y ddogfen: 4782A2025

Paratowyd y ddogfen hon fel rhan o waith a gyflawnir yn unol â swyddogaethau statudol.

Rydym yn croesawu gohebiaeth a galwadau ffôn yn Gymraeg a Saesneg. Ni fydd gohebu yn Gymraeg yn arwain at oedi.

Mae'r ddogfen hon hefyd ar gael yn Saesneg.

Cynnwys

Adroddiad cryno	
Pam y cynhaliom ni'r archwiliad hwn	4
Ein dyletswyddau archwilio	4
Ein hamcanion ar gyfer yr archwiliad hwn	4
Pam fod comisiynu'n bwysig	4
Yr hyn y gwnaethom fwrw golwg arno a sut y mae da'n edrych	5
Ein dulliau archwilio a phryd y cynhaliom ni'r archwiliad	5
Yr hyn a ganfuom	6
Ein hargymhellion i'r Cyngor	9
Atodiadau	
Atodiad 1 – cwestiynau a meini prawf archwilio	10

Adroddiad cryno

Pam y cynhaliom ni'r archwiliad hwn

Ein dyletswyddau archwilio

- 1 Rydym yn cynnal yr archwiliad hwn dan y dyletswyddau sydd wedi eu cynnwys yn:
 - adran 17 Deddf Archwilio Cyhoeddus (Cymru) 2004 (Deddf 2004) i helpu i alluogi'r Archwilydd Cyffredinol i fod wedi'i argyhoeddi (neu beidio) bod y Cyngor wedi sefydlu trefniadau priodol i sicrhau gwerth am arian o ran y modd y mae'n defnyddio ei adnoddau; ac
 - adran 15 Deddf Llesiant Cenedlaethau'r Dyfodol (Cymru) 2015 i helpu i alluogi'r Archwilydd Cyffredinol i asesu i ba raddau y mae'r Cyngor yn gweithredu yn unol â'r egwyddor datblygu cynaliadwy wrth gymryd camau i gyflawni ei amcanion llesiant.
- 2 Gall yr archwiliad hwn oleuo astudiaeth ar gyfer gwella gwerth am arian dan adran 41 Deddf 2004 hefyd.

Ein hamcanion ar gyfer yr archwiliad hwn

- 3 Ein hamcanion ar gyfer yr archwiliad hwn yw:
 - darparu sicrwydd bod gan gynghorau drefniadau priodol ar gyfer comisiynu gwasanaethau i sicrhau gwerth am arian o ran y modd y maent yn defnyddio adnoddau;
 - darparu sicrwydd bod cynghorau'n gweithredu yn unol â'r egwyddor datblygu cynaliadwy wrth gomisiynu gwasanaethau; ac
 - egluro sut y mae cynghorau'n mynd ati i gomisiynu gwasanaethau ac ysbrydoli a grymuso cynghorau a chyrff eraill yn y sector cyhoeddus trwy adnabod a rhannu enghreifftiau o arfer/dulliau nodedig lle y bo'n berthnasol.
- 4 Rydym yn cynnal yr archwiliad hwn ym mhob un o'r 22 o brif gynghorau yng Nghymru.

Pam fod comisiynu'n bwysig

- 5 Comisiynu yw'r broses a ddefnyddir gan y Cyngor i ddylunio gwasanaethau y mae'n bwriadu eu darparu. Mae'n dechrau â diffinio'r gwasanaeth a'r allbynnau a deilliannau a ddymunir ac yn diweddu pan fo'r Cyngor yn trefnu ei ddull darparu. Er enghraifft, trwy sefydlu tîm darparu yn fewnol, neu drwy gaffael cyflenwr allanol.
- 6 Gall trefniadau comisiynu helpu i sicrhau bod gwasanaethau'n cael eu darparu mewn modd darbodus, effeithlon ac effeithiol. I'r gwrthwyneb, gall gwendidau mewn trefniadau comisiynu leihaus effaith gwasanaethau a'u gwerth am arian, hyd yn oed os yw'r prosesau sy'n dilyn, megis caffael a rheoli contractau, yn gadarn.



Yr hyn y gwnaethom fwrw golwg arno a sut y mae da'n edrych¹

- 7 Fe wnaethom adolygu trefniadau'r Cyngor ar gyfer comisiynu gwasanaethau ac yn benodol i ba raddau y mae hyn wedi cael ei ddatblygu yn unol â'r egwyddor datblygu cynaliadwy; ac y bydd yn helpu i sicrhau gwerth am arian o ran y modd y defnyddir adnoddau'r Cyngor.
- 8 Nid oedd yr archwiliad hwn yn cynnwys trefniadau caffael na threfniadau rheoli contractau'r Cyngor.
- 9 Roedd yr archwiliad yn ceisio ateb y cwestiwn cyffredinol hwn: **Wrth gomisiynu gwasanaethau, a yw'r Cyngor yn sefydlu trefniadau priodol i sicrhau gwerth am arian o ran y modd y mae'n defnyddio ei adnoddau?**
- 10 Fe ddefnyddiom ni'r meini prawf archwilio a nodir yn **Atodiad 1**, sydd hefyd yn dangos y berthynas rhwng y meini prawf a'r cwestiynau archwilio. Goleuwyd hyn gan ein gwybodaeth gronns yn ogystal â'r hierarchaeth gwestiynau a dangosyddion cadarnhaol yr ydym wedi'u datblygu i ategu ein harchwiliadau o gymhwyso'r Egwyddor Datblygu Cynaliadwy.



Ein dulliau archwilio a phryd y cynhaliom ni'r archwiliad

- 11 Mae ein canfyddiadau'n seiliedig ar adolygiadau o ddogfennau, a chyfweliadau gyda'r uwch swyddog(ion) sy'n gyfrifol am ddatblygu dull comisiynu strategol y Cyngor. Fe wnaethom hefyd gyfwrdd ag uwch swyddogion â chyfrifoldeb am wasanaethau y mae'r Cyngor wedi'u comisiynu'n allanol.
- 12 O ystyried yr ystod eang o wasanaethau sydd gan y Cyngor, fe wnaethom brofi sampl o'r trefniadau y mae'r Cyngor wedi'u sefydlu i gomisiynu gwasanaethau. I wneud hyn, fe ddewisom ni dri gwasanaeth lle mae'r Cyngor wedi penderfynu comisiynu gwasanaethau'n allanol ac fe archwiliom ni'r trefniadau comisiynu y mae'r Cyngor wedi'u rhoi ar waith. Y sampl o feysydd gwasanaeth y gwnaethom eu hadolygu yn y Cyngor oedd:
 - darparu gwersi cerddorol mewn ysgolion;
 - buddsoddiad ychwanegol mewn gwasanaethau bysiau lleol; a hefyd
 - Cydlynnydd y Bartneriaeth Bwyd.

¹ Fe'i diffinnir fel 'yr hyn a ddylai fod' yn ôl deddfau neu reoliadau, 'yr hyn a ddisgwylir' yn ôl arfer gorau, neu 'yr hyn a allai fod', pe bai'r amodau'n well.

- 13 Mae'r dystiolaeth yr ydym wedi'i defnyddio i oleuo ein canfyddiadau'n gyfyngedig i'r ffynonellau hyn. Fe wnaethom y gwaith hwn yn ystod mis Hydref a mis Tachwedd 2024.
- 14 Rydym yn gwneud y gwaith hwn ym mhob un o'r 22 o brif gynghorau yng Nghymru ac, yn ogystal ag adrodd yn lleol wrth bob cyngor, rydym hefyd yn bwriadu cynhyrchu adroddiad cenedlaethol.



Yr hyn a ganfuom

- 15 Ar y cyfan, canfuom fod **gan y Cyngor ddull comisiynu corfforaethol, ond nad yw'r dull hwn yn cael ei ddilyn yn rheolaidd, sy'n cyfyngu ar ei allu i asesu gwerth am arian o'i weithgarwch comisiynu.** Rydym yn nodi isod pam y daethom i'r casgliad hwn.
- 16 Mae strategaeth Comisiynu, Caffael a Rheoli Contractau'r Cyngor (y Strategaeth) 2022-25 yn nodi'n glir beth yw ei ddull a'i ddisgwyliadau lle mae comisiynu yn y cwestiwn. Mae gan y Cyngor set o egwyddorion sy'n ategu ei ddull y mae'n rhaid i'r holl wasanaethau sy'n ystyried comisiynu gwasanaethau ymlynu wrthynt.
- 17 Mae trefniadau comisiynu'r Cyngor yn ei gwneud yn ofynnol i feysydd gwasanaeth ddiffinio'r gwasanaethau y byddant yn eu comisiynu a'r sail resymegol dros wneud hynny. Ar gyfer y gwasanaethau a adolygwyd gennym ni, roedd y diffiniad o'r gwasanaeth a'r sail resymegol dros wneud hynny'n glir. Mae bod â dealltwriaeth glir am y gwasanaeth sydd i'w gomisiynu a pham fod gwasanaethau'n cael eu comisiynu'n elfennau pwysig o drefniadau'r Cyngor i sicrhau gwerth am arian.
- 18 Mae trefniadau comisiynu'r Cyngor yn ei gwneud yn ofynnol cael achos busnes gan bob gwasanaeth sy'n ystyried gweithgarwch comisiynu a hwnnw'n cynnwys:
- arfarniad o'r opsiynau;
 - manylion y deilliannau a'r manteision bwriadedig;
 - dadansoddiad o'r cyfraniad y mae'r gwasanaeth yn ei wneud at flaenoriaethau corfforaethol y Cyngor;
 - 'Offeryn Sgrinio Egwyddorion Cynllunio' wedi ei gwblhau i adnabod y cyfraniad at Ddeddf Llesiant Cenedlaethau'r Dyfodol (Cymru) 2015;
 - asesiad o'r effaith ar gydraddoldeb;
 - rhanddeiliaid allweddol;
 - adnoddau y mae eu hangen; a
 - risgiau a chyfleoedd.
- 19 Fodd bynnag, canfuom nad oedd yr un o'r tri gwasanaeth a adolygwyd gennym ni wedi cwblhau achos busnes. Dim ond un o'r gwasanaethau hyn allai ddangos ei fod wedi adolygu gwahanol opsiynau ar gyfer darparu gwasanaethau. Rydym yn cydnabod yr angen am ddull cymesur o gynnal proses arfarnu opsiynau gan ddibynnu ar raddfa a gwerth gwasanaeth a gomisiynir. Fodd bynnag, mae peidio â dogfennu ystyriaeth i wahanol opsiynau'n golygu nad yw'r Cyngor wastad yn gallu

bod â sicrwydd ei fod wedi ystyried ystod o opsiynau i wneud yn siŵr ei fod yn sicrhau gwerth am arian. Mae hyn yn arbennig o bwysig ar adeg pan fo'r Cyngor yn profi heriau ariannol sylweddol ac yntau, trwy ei Gynllun Ariannol Tymor Canolig, wedi adnabod bwlch o ran cyllid o £12.6 miliwn yn 2025-26 ac £14.7 miliwn yn 2026-27².

- 20 Mae'r Cyngor yn disgwyl i wasanaethau sy'n cwblhau achos busnes ddatgan deilliannau a manteision y gwasanaeth y maent yn bwriadu ei gomisiynu. Fodd bynnag, ar gyfer dau o'r gwasanaethau a adolygwyd gennym ni, nid oedd deilliannau bwriadedig wedi eu diffinio'n glir. Elfen allweddol o asesu'r gwerth am arian a geir o wasanaeth a gomisiynwyd yw deall y manteision ariannol a/neu eraill posibl ar y dechrau un. Heb ddatgan yn glir beth yw'r manteision bwriadedig, mae'n anodd i'r Cyngor asesu i ba raddau y mae'r gwasanaeth a gomisiynwyd yn sicrhau gwerth am arian.
- 21 Nid yw trefniadau comisiynu'r Cyngor yn ei gwneud yn ofynnol yn benodol deall ffactorau cyfredol a hirdymor a allai effeithio ar wasanaeth a gomisiynwyd. Er gwaethaf hyn, canfuom ar gyfer y gwasanaethau a adolygwyd gennym, fod meysydd gwasanaeth y Cyngor yn gallu mynegi'r ffactorau byrdymor a hirdymor a allai effeithio arnynt. Fodd bynnag, nid yw gwasanaethau wastad yn dogfennu'r ystyriaethau hyn. Mae sicrhau y rhoddwyd ystyriaeth wedi ei dogfennu i'r ffactorau hirdymor a byrdymor a goblygiadau penderfyniadau comisiynu'n lleihau'r risg o beidio â chyflawni gwerth am arian dros y tymor hwy.
- 22 Ceir sail resymegol glir ar gyfer hyd contractau ar gyfer y gwasanaethau a adolygwyd gennym. Er enghraifft, mae hyd contractau'n ystyried y cylch arian grant perthnasol. Fodd bynnag, nid yw trefniadau comisiynu'r Cyngor yn ei gwneud yn ofynnol i feysydd gwasanaeth ystyried am faint o amser y mae'n briodol cynllunio ar gyfer comisiynu gwasanaethau i gael yr effaith fwyaf neu'r gwerth mwyaf am arian. Er y dylai'r Cyngor gymryd gofal i osgoi gwneud ymrwymïadau ariannol diangen, mae'n bwysig bod meysydd gwasanaeth yn ystyried nifer o ffactorau wrth gynllunio ar gyfer y tymor hwy i sicrhau gwerth am arian. Gall yr ystyriaethau hyn gynnwys darparu sefydlogrwydd ar gyfer darparwyr gwasanaethau neu gyflawni amcanion tymor hwy y gellir eu cyflawni y tu hwnt i gylchoedd arian grant a all fod yn fyrdymor.
- 23 Mae gan y Cyngor drefniadau i sicrhau bod meysydd gwasanaeth yn ystyried goblygiadau ei weithgarwch comisiynu o ran adnoddau. Mae templed y Cyngor ar gyfer achosion busnes yn ei gwneud yn ofynnol cynnwys gwybodaeth am y costau cyfredol a'r adnoddau y rhagwelir y bydd eu hangen ar gyfer gwasanaethau a gomisiynir, gan gynnwys cymorth a ddisgwylir gan feysydd gwasanaeth eraill. Mae'r Cyngor yn ystyried gwerth ariannol comisiynu gwasanaeth ac adnoddau ychwanegol y Cyngor, er enghraifft amser swyddogion. Mae'r trefniant hwn yn rhoi golwg fwy eang i'r Cyngor ar yr adnoddau y mae eu hangen i ddarparu a chefnogi gwasanaethau a gomisiynir.

² Cyngor Bwrdeistref Sirol Wrecsam – Adolygiad o Gynaliadwyedd Ariannol

- 24 Mae'r Cyngor yn ystyried effaith ehangach gwasanaethau a gomisiynir ganddo. Trwy achosion busnes, mae'n ofynnol i wasanaethau ddangos eu bod yn cyd-fynd â blaenoriaethau corfforaethol y Cyngor a sut y mae'r gwasanaeth yn cyfrannu at flaenoriaethau partneriaid allanol. Gall ystyried y goblygiadau ac effaith ehangach helpu'r Cyngor i osgoi dyblygu ac adnabod manteision lluosog sy'n sicrhau deilliannau gwell a mwy o werth am arian.
- 25 Mae trefniadau comisiynu'r Cyngor yn ei gwneud yn ofynnol i feysydd gwasanaeth adnabod rhanddeiliaid. Roedd gan y tri gwasanaeth a adolygwyd gennym ddealltwriaeth dda am bartneriaid y Cyngor. Gall adnabod yr ystod lawn o gyfleoedd i weithio mewn partneriaeth helpu'r Cyngor i sicrhau ei fod yn darparu gwasanaethau mewn ffordd sy'n cael y gwerth mwyaf posibl am arian.
- 26 Mae Strategaeth y Cyngor yn ysgogi gwasanaethau i gynnwys y rhai y byddai comisiynu gwasanaeth yn effeithio arnynt. Canfuom fod dau o'r gwasanaethau a adolygwyd gennym wedi cynnwys defnyddwyr gwasanaethau. Mae hyn yn bwysig gan bod gweithio gyda'r bobl iawn yn gallu helpu'r Cyngor i sicrhau ei fod yn comisiynu gwasanaethau sy'n diwallu anghenion ei gymunedau, a'i fod felly'n darparu'r gwasanaethau hyn mewn ffordd sy'n cael y gwerth mwyaf posibl am arian.
- 27 Mae Strategaeth y Cyngor yn dangos yn glir pryd ddylai swyddogion o'r Uned Comisiynu, Caffael a Rheoli Contractau (yr Uned) gael eu cynnwys mewn gweithgarwch comisiynu. Gall y cymorth gan yr Uned helpu gwasanaethau trwy'r broses gomisiynu a dylai roi sicrwydd i'r Cyngor bod dull comisiynu cyson i'w gael.
- 28 Nid oes gan y Cyngor ddull strwythuredig ar gyfer mynd ati'n rheolaidd i rannu gwersi a ddysgwyd o weithgarwch comisiynu ar draws y sefydliad. Fodd bynnag, mae'r swyddogion yn yr Uned yn rhannu gwersi a ddysgwyd a phrofiad i gefnogi gwasanaethau trwy'r broses gomisiynu.
- 29 Mae gan y Cyngor hefyd drefniadau ar gyfer gwerthuso ar ôl comisiynu, ond nid yw gwasanaethau'n cwblhau'r gwerthusiad yn rheolaidd. Fodd bynnag, fe welsom enghraifft gynhwysfawr o hyn yn cael ei wneud ar gyfer un o'r gwasanaethau a adolygwyd gennym. Mae rhannu gwersi a ddysgwyd a gwerthuso ar ôl comisiynu'n bwysig, oherwydd er bod rhai gwasanaethau'n gwneud llawer o gomisiynu allanol, mae meysydd eraill o fewn y Cyngor yn llai profiadol. Mae gwerthuso effeithiolrwydd gweithgarwch comisiynu'n bwysig i helpu i adnabod meysydd ar gyfer gwella, rhannu gwersi, a sicrhau gwerth am arian.

Ein hargymhellion i'r Cyngor

Arddangosyn 1: ein hargymhellion i'r Cyngor

Argymhellion

Cryfhau'r modd y cydymffurfir â'i drefniadau comisiynu

- A1 I sicrhau bod dull comisiynu corfforaethol y Cyngor yn cael ei roi ar waith yn gyson ar draws meysydd gwasanaeth, dylai'r Cyngor gyflwyno trefniadau i fonitro'r modd y cydymffurfir â'i ddull comisiynu corfforaethol. (**Paragraffau 19 i 20 a 26**).

Adolygu trefniadau comisiynu'r Cyngor

- A2 I sicrhau bod y Cyngor yn adnabod cyfleoedd i wella gwerth am arian, dylai fynd ati'n rheolaidd i werthuso effeithiolrwydd ei drefniadau comisiynu ar draws y sefydliad. (**Paragraffau 28 i 29**).

Atodiad 1

Cwestiynau a meini prawf archwilio

Cwestiwn cyffredinol: Wrth gomisiynu gwasanaethau a yw'r Cyngor yn sefydlu trefniadau priodol i sicrhau gwerth am arian o ran y modd y mae'n defnyddio ei adnoddau?

Level 2 questions	Cwestiynau Lefel 3	Meini Prawf
A oes gan y Cyngor resymeg eglur dros gomisiynu gwasanaethau?	A yw'r Cyngor yn diffinio'n glir pa wasanaethau y mae'n bwriadu eu comisiynu a pham?	• Mae'r Cyngor yn nodi diffiniad clir o'r gwasanaethau y mae'n bwriadu eu comisiynu. • Mae'r Cyngor yn nodi 'pam' fod arno angen comisiynu'r gwasanaethau gan gynnwys: – effaith/deilliannau bwriadedig darparu'r gwasanaeth; ac – a fydd/sut y bydd y gwasanaeth yn helpu'r Cyngor i gyflawni ei ddyletswyddau statudol
	A yw'r Cyngor yn cynnal arfarniad cynhwysfawr o'r opsiynau comisiynu cyn penderfynu comisiynu gwasanaeth?	• Mae'r Cyngor yn ystyried yr ystod lawn o opsiynau comisiynu ar gyfer darparu'r gwasanaeth – gallai'r opsiynau gynnwys y canlynol, er enghraifft: – darpariaeth fewnol; – trefniadau partneriaeth neu ddulliau o gomisiynu o fewn ac ar draws sectorau; – allanoli'r gwasanaeth i ddarparwr arall trwy ymddiriedolaeth neu drefniant arall; a – chontractio'r gwasanaeth trwy broses dendro. • Mae'r Cyngor yn ystyried costau a manteision yr opsiynau o safbwynt darbodaeth, effeithlonrwydd ac effeithiolrwydd – gan gynnwys dros y tymor byr, canolig a hir. • Mae'r Cyngor yn cynnwys costau rheoli contract o fewn ei asesiad o opsiynau comisiynu. • Mae'r Cyngor yn cynnwys asesiad o risg ar gyfer pob opsiwn comisiynu fel rhan o asesu costau a manteision. • Mae'r Cyngor yn defnyddio amrywiaeth eang o wybodaeth o ffynonellau mewnol ac allanol i ddatblygu dealltwriaeth am y ffactorau cyffredol a hirdymor sy'n debygol o effeithio ar wasanaethau a gomisiynir.
A yw'r Cyngor yn cynllunio dros raddfa amser briodol?	A yw'r Cyngor yn ystyried beth mae hirdymor yn ei olygu wrth gomisiynu gwasanaethau?	• Mae'r Cyngor yn ystyried beth mae hirdymor yn ei olygu wrth gynllunio ei ddull o gomisiynu gwasanaethau – h.y. pa mor bell ymlaen all/ddylai gynllunio a pham. • Mae'r Cyngor yn ystyried sut y bydd yn taro cydbwysedd rhwng anghenion byrdymor a

Level 2 questions	Cwestiynau Lefel 3	Meini Prawf
		hirdymor wrth gynllunio ar gyfer comisiynu gwasanaethau gan gynnwys, er enghraifft, wrth bennu'r ffrâm amser ar gyfer contractau neu drefniadau comisiynu eraill
	A yw'r Cyngor yn deall y goblygiadau hirdymor o ran adnoddau wrth gomisiynu gwasanaethau?	- Mae'r Cyngor yn meddwl am yr adnoddau y bydd eu hangen arno dros y tymor canolig a hwy (costau oes gyfan) i ddarparu gwasanaethau a gomisiynir. - Mae'r Cyngor yn ystyried sut y gellid gweithredu ystod o senarios lleihau cyllideb yn y dyfodol mewn perthynas â gwasanaethau a gomisiynir.
	A yw'r Cyngor yn nodi sut y bydd yn monitro gwerth am arian gwasanaethau a gomisiynir dros y tymor byr, canolig a hir?	- Mae'r Cyngor yn nodi'r trefniadau monitro y bydd yn eu dilyn ar gyfer y gwasanaeth a gomisiynir - Dylai'r Cyngor ddisgrifio sut y bydd gwerth am arian gwasanaethau a gomisiynir yn cael ei asesu a'i fonitro gan gynnwys: - costau a manteision; a - Chynnydd tuag at gerrig milltir a mesurau tymor byr, canolig a hwy
A yw'r Cyngor wedi meddwl am yr effeithiau ehangach y gallai ei wasanaeth a gomisiynir eu cael?	Wrth gomisiynu gwasanaethau, a yw'r Cyngor yn ystyried sut y gall gynyddu eu cyfraniad at amcanion llesiant y Cyngor i'r eithaf?	Mae'r Cyngor yn ystyried sut y bydd gwasanaethau a gomisiynir yn effeithio ar ei holl amcanion llesiant ei hun i sicrhau manteision lluosog, osgoi dyblygu neu unrhyw ganlyniadau anfwriadol, e.e. ystyried amcanion tymor hwy, y gadwyn gyflenwi leol, cydnerthedd y farchnad ac effaith hyd contractau, bioamrywiaeth, a lleihau carbon
	Wrth gomisiynu gwasanaethau, a yw'r Cyngor yn ystyried sut y gall gwasanaethau gynyddu eu cyfraniad at amcanion llesiant cyrff eraill yn y sector cyhoeddus i'r eithaf?	Mae'r Cyngor yn ystyried sut y bydd gwasanaethau a gomisiynir yn effeithio ar amcanion llesiant cyrff eraill yn y sector cyhoeddus i sicrhau manteision lluosog ac osgoi dyblygu neu unrhyw ganlyniadau anfwriadol
	Wrth gomisiynu gwasanaethau, a yw'r Cyngor yn ystyried sut y gall gwasanaethau gynyddu eu cyfraniad at y Nodau Llesiant Cenedlaethol i'r eithaf?	Mae'r Cyngor yn ystyried sut y bydd gwasanaethau a gomisiynir yn effeithio ar y nodau llesiant cenedlaethol i sicrhau manteision lluosog ac osgoi dyblygu neu unrhyw ganlyniadau anfwriadol
A yw'r Cyngor yn gweithio gyda'r bobl a'r partneriaid iawn i ddylunio a darparu ei wasanaethau a gomisiynir?	A yw'r Cyngor wedi adnabod pwy y mae angen iddo eu cynnwys?	Mae'r Cyngor yn deall pwy fydd gwasanaethau a gomisiynir yn effeithio'n uniongyrchol ac yn anuniongyrchol arnynt. Goleuwyd hyn gan ddadansoddiad rhanddeiliaid neu ymarfer tebyg.
	A yw'r Cyngor yn cynnwys amrywiaeth lawn y bobl?	Mae'r Cyngor yn cynnwys yr amrywiaeth lawn o safbwyntiau wrth benderfynu sut i gomisiynu gwasanaethau.

Level 2 questions	Cwestiynau Lefel 3	Meini Prawf
		Mae'r Cyngor yn defnyddio canlyniadau gweithgarwch cynnwys i oleuo sut y bydd yn comisiynu gwasanaethau, gan gynnwys ei effaith ar grwpiau sy'n rhannu nodweddion gwarchodedig
	A yw'r Cyngor yn cydweithio gyda'r partneriaid cywir?	- Mae'r Cyngor yn deall yn dda pa bartneriaid a pha bartneriaid posibl y gallai weithio gyda hwy i gomisiynu gwasanaethau i wella gwerth am arian. Goleuwyd hyn gan ddadansoddiad cynhwysfawr o bartneriaid posibl a'u blaenoriaethau. - Lle mae cyfleoedd i wella gwerth am arian trwy gomisiynu gwasanaethau mewn partneriaeth yn cael eu hadnabod, mae'r Cyngor yn mynd ar eu trywydd.
A oes gan y Cyngor drefniadau i werthuso gwerth am arian ei ddull comisiynu?	A yw'r Cyngor yn mynd ati fel rhan o'r drefn arferol i werthuso effeithiolrwydd ei drefniadau comisiynu?	- Mae'r Cyngor yn adolygu effeithiolrwydd ei ddull comisiynu'n rheolaidd gan gynnwys: - I ba raddau y mae gwasanaethau a gomisiynir yn cyflawni'r amcanion y mae'r Cyngor wedi'u pennu; a - Gwerth am arian modelau comisiynu a ddewiswyd gan gynnwys ystyried mewnbynnau, allbynnau a deilliannau.
	A yw'r Cyngor yn mynd ati fel rhan o'r drefn arferol i rannu unrhyw wersi a ddysgwyd i oleuo ymarferion comisiynu yn y dyfodol?	Mae'r Cyngor yn rhannu ac yn cymhwyso unrhyw wersi a ddysgwyd o'i ddull comisiynu yn eang ar draws y sefydliad, a chyda phartneriaid lle y bo'n berthnasol.



Archwilio Cymru

1 Cwr y Ddinas

Caerdydd CF10 4BZ

Ffôn: 029 2032 0500

Ffacs: 029 2032 0600

Ffôn testun: 029 2032 0660

E-bost: post@archwilio.cymru

Gwefan: www.archwilio.cymru

We welcome correspondence and telephone calls in Welsh and English.
Rydym yn croesawu gohebiaeth a galwadau ffôn yn Gymraeg a Saesneg.